

**Bosna i Hercegovina
Federacija Bosne i Hercegovine
Zeničko-dobojski kanton
OPĆINA VAREŠ
OPĆINSKO VIJEĆE**



**Broj: 01-301/25
Vareš, 27.11. 2025. godine**

Na osnovu člana 13. i člana 36. Zakona o principima lokalne samouprave u Federaciji BiH („Službene novine Federacije BiH“, broj: 49/06 i 51/09), člana 13. stav 4. Zakona o pripadnosti javnih prihoda u Federaciji BiH („Službene novine Federacije BiH“, broj: 22/06, 43/08, 22/09, 35/14, 94/15 i 17/22) te člana 22. stav 1. tačke 6. Statuta Općine Vareš – Prečišćeni tekst broj: 01-162/12 od 11.09.2012. godine, Općinsko vijeće Vareš na 11. sjednici održanoj dana 27.11. 2025. godine, d o n o s i

ODLUKU **o općinskim komunalnim taksama**

I. OPĆE ODREDBE

Član 1.
(Predmet)

Ovom odlukom utvrđuju se vrste komunalnih taksi, obveznik plaćanja, kriteriji, visina takse, način plaćanja, oslobađanja od plaćanja, način prijave, naplate takse i povrat takse za obveznike na području općine Vareš.

Član 2.
(Definisanje pojmova)

Pojmovi u smislu ove odluke:

- a) držanje i izvođenje muzike uživo u ugostiteljskim objektima podrazumijeva povremeno ili svakodnevno izvođenje muzičkog programa uz pružanje ugostiteljskih usluga;
- b) isticanje objava, oglasa i saopćenja na javnim mjestima podrazumijeva postavljanje stalnih ili privremenih banera, plakata, panoa na javnim mjestima u štampanoj ili elektronskoj formi. Ovdje se svakako podrazumijeva reklamiranje brendova, proizvoda ili usluga koje pružaju pravne ili fizičke osobe ili koje imaju svrhu putokaza prema mjestu sjedišta sponzora koji ih je postavio;

adresa: Zvijezda 34, 71330Vareš
identifikacijski broj: 4218285300002
depozitni račun Unicredit banka:
3380002210017420

tel.: 00387 32 848 100;
fax: 00387 32 848 150;
web: www.vares.info
e-mail: vares@bih.net.ba

- c) korištenje prostora na javnim mjestima za kampove (šatore, prikolice, motorna vozila svih kategorija), deponije materijala i drugu privremenu upotrebu;
- d) postavljanje uređaja za isplatu i naplatu gotovine (bankomata), podrazumijeva svako zauzimanje površine radi postavljanja i instaliranja ovakvih uređaja u svrhu pružanja usluga prema konzumentima.

II. OSNOV I POČETAK NASTANKA OBAVEZE

Član 3.

(Osnov za plaćanje takse)

Na području Općine Vareš propisuju se i naplaćuju komunalne takse za:

- a) Držanje i izvođenje muzike uživo u ugostiteljskim objektima;
- b) Isticanje objava, oglasa i saopćenja na javnim mjestima;
- c) Svako korištenje prostora na mjestima za kampove (šatore, prikolice i motorna vozila svih kategorija) podrazumijeva zauzimanje prostora za privremeni boravak od strane jedne ili više osoba;
- d) Postavljanje uređaja za isplatu i naplatu gotovine (bankomata).

Član 4.

(Početak nastanka obaveze)

Taksena obaveza iz člana 3. stav 1. tačke a) do d) ove Odluke nastaje od trenutka otpočinjanja pružanja usluga, korištenja uređaja ili prostora za čije korištenje je ovom odlukom propisano plaćanje komunalne takse.

Član 5.

(Obveznici plaćanja takse)

Takseni obveznici su sva pravna i fizička lica koja na području općine Vareš koriste predmet, prostor ili pružaju usluge za čije je korištenje propisano plaćanje takse.

III. NAČIN PRIJAVE I NAPLATA

Član 6.

(Podnošenje prijave za razrez taksene obveze)

- 1) Obveznik plaćanja takse je svako pravno lice koje je posjednik uređaja iz člana 3. stav 1. tačka d) ove odluke.
- 2) Prijavu za razrez komunalne takse iz člana 3. stav 1. tačke d) porezni obveznik je dužan podnijeti Poreznoj upravi, Ispostava Vareš (u daljem tekstu: Porezna uprava) do 31. januara tekuće godine, prema stanju na dan 01. januar tekuće godine za koju se razrez vrši, odnosno u roku od 15 dana od dana postavljanja uređaja po članu 3. stav 1. tačke d).
- 3) Porezna prijava komunalne takse podnosi se na propisanom obrascu koji čini sastavni dio ove Odluke.
- 4) Pravno lice kao obveznik komunalne takse dužan je Poreznoj upravi podnijeti prijavu za komunalnu taksu isključivo elektronski, dok fizička lica mogu i putem Obrasca.

- 5) Prijavu za razrez komunalne takse iz člana 3. stav 1. tačke b) i c) porezni obveznik je dužan podnijeti nadležnoj službi Općine 5 dana prije nastanka taksene obaveze.
- 6) Ukoliko takseni obveznik u propisanom roku ne podnese prijavu ili dostavi netačne podatke, prijavu takse će izvršiti Porezna uprava u roku od 15 dana nakon isteka zakonskog roka u skladu sa odredbama Zakona o Poreznoj upravi Federacije BiH i podzakonskim aktima.

Član 7. (Obračun i način plaćanja)

Taksa iz člana 3. ove odluke se obračunava i plaća na način iz:

- a) Tačka a) se obračunava i plaća dnevno po privređivanju muzike uživo, s tim da se za istu podnosi prijava poreznoj upravi najkasnije tri dana prije početka izvođenja muzike;
- b) Tačke b) i c) po podnošenju prijave nadležnoj Općinskoj službi;
- c) Tačka d) - jednom u toku kalendarske godine u roku od 15 dana po isteku roka za prijavljivanje takse.

IV. TARIFNI SISTEM

IV.1. Tarifni brojevi

Član 8. (Tarifni brojevi)

Tarifni broj 1.

a) Za priređivanje muzike uživo u ugostiteljskim objektima plaća se komunalna taksa dnevno u iznosu od 15,00 KM, s tim da se za istu podnosi prijava poreskoj upravi najkasnije tri dana prije početka izvođenja muzike.

Tarifni broj 2.

Za isticanje objava, oglasa plakata, panoa i saopćenja na javnim mjestima određenim za te namjene plaća se jednokratno taksa, i to za:

- a) Seriju do 100 kom. - 50,00 KM
- b) Seriju preko 100 kom. - 100,00 KM
- c) Postavljanje stalnih panoa i displeja po 1m² - 50,00 KM godišnje.
- d) Postavljanje povremenih panoa i displeja po 1m² - 3,00 KM po danu.

Tarifni broj 3.

Za postavljanje kampova na javnim mjestima (šatora, prikolica, motornih vozila svih kategorija) deponije materijala i drugu privremenu upotrebu plaća se dnevna taksa:

- a) Za svaki šator 1,00 KM
- b) Za kamp prikolicu 0,50 KM
- c) Za motorno vozilo 0,50 KM

Tarifni broj 4.

Za postavljanje uređaja za isplatu i naplatu gotovine (bankomati i sl.) plaća se taksa godišnje po jednom uređaju u iznosu od 1.000,00 KM.

Član 9.
(Pripadnost i uplata takse)

1) Taksa iz člana 3. stav 1. tačka a), b) i c) ove Odluke se uplaćuje na Depozitni račun Budžeta Općine Vareš broj: 3380002210017420 otvoren kod UniCredit banke, šifra Općine 096, sa naznakom vrste prihoda 722321 u skladu sa Pravilnikom o načinu uplate javnih Prihoda budžeta i izvanbudžetskih fondova na teritoriji Federacije Bosne i Hercegovine i izvorni su prihod Općine Vareš.

2) Taksa iz člana 3. stav 1. tačka d) ove Odluke se uplaćuje na Depozitni račun Budžeta Općine Vareš broj: 3380002210017420 otvoren kod UniCredit banke, šifra Općine 096, sa naznakom vrste prihoda 722322 u skladu sa Pravilnikom o načinu uplate javnih Prihoda budžeta i izvanbudžetskih fondova na teritoriji Federacije Bosne i Hercegovine i izvorni su prihod Općine Vareš.

V. OSLOBAĐANJE OD PLAĆANJA I POVRAT TAKSE

Član 10.
(Oslobađanje od plaćanja komunalne takse)

Od plaćanja komunalne takse iz člana 3. stav 1. tačke a) do d) oslobođeni su:

- a) organi državne, federalne i kantonalne uprave i lokalne samouprave;
- b) federalne, kantonalne i lokalne javne ustanove;
- c) javna preduzeća čiji je osnivač Općina Vareš;
- d) poljoprivredne zadruge, zavodi, vjerske zajednice, političke stranke, sindikati, komore, udruženja, dobrovoljna vatrogasna društva, turističke zajednice, sportska društva i savezi, fondacije, zaklade, humanitarne organizacije;
- e) Radio i televizijske djelatnosti.

Član 11.
(Povrat pogrešno ili više uplaćene takse)

- 1) Obveznik od kojeg je taksa naplaćena, a koju nije bio dužan platiti ili je više uplatio, ima pravo na povrat.
- 2) Zahtjev za povrat se podnosi Službi za privredu, finansije i trezor Općine Vareš.

Član 12.
(Nadzor i kontrola prijave)

Nadzor i kontrola prijave, obračuna i plaćanja općinske komunalne takse vrši Porezna uprava u saradnji sa Službom za privredu, finansije i trezor Općine Vareš.

Član 13.

(Stvarno nadležni organi za provođenje ove Odluke)

Ovu Odluku provodi Porezna uprava i Služba za privredu, finansije i trezor Općine Vareš.

Član 14.

(Stupanje na snagu)

Ova Odluka stupa na snagu osmog dana od dana objavljivanja na oglasnoj tabli Općine Vareš.



**PREDSJEDAVAJUĆI
OPĆINSKOG VIJEĆA**

Malik Rizvanović

Malik Rizvanović

Ova odluka je objavljena na oglasnoj tabli Općine Vareš dana 28.11. 2025. godine



OPĆINSKI NAČELNIK

Zdravko Marešević

